



Bentiaraq Ottosen
Atassut

UKA 2023/76
8. november. 2023

**Ilinniartitaanerup aaqqissuusaanera eqaatsoq ataqatigiittorlu qanoq
toqqammavilernissaanut apeqquteqaat aallaavigalugu oqallinnissamik siunnersuut**
(Inatsisartunut ilaasortaq Najaaraq Møller, Siumut)

Ilinniartitaanerup aaqqissuusaanera oqallisigilluarneqartariaqartut ilagaat, assersuutigiinnassavara meeqqat atuarfiat eqqortuusariaqartoq ingerlaqqinnissamut siunnerfinnik. Naammassinnissinnaasariaqqarpugut meeqqat atuarfiat eqqortumik aaqqissuusaanera ataqatigiissassallugu.

Angajoqqaat annertuumik meeqqamut toqqammaviliisuupput, tassunga atatillugu isumaqangilanga pingaarnersiuinerit attanneqartariaqartut. Pissutigalugu meeqqat atuarfiat tassaamat meeqqap aallartinnerminiilli toqqammavigiligassai, tassunngalu atatillugu pingaartorujussuuvog oqaatigineqarnissaa sinaakkutit meeqqamut siunissamullu toqqammaviliisariaqartut.

Eqqortuusorinangilaq oqaatigineqassappat ilinniartitsisut tassaasut meeqqamut perorsaasut, isumaqarpungali ilinniartitsisut tassaasut atuagarsornikkut ilinniartitsissutillit. Taannami aamma siunertaagunaralarpoq, maanakkulli ilinniartitsisut tassapput meeqqamut perorsaasut. Ila taamatut iliorneq isumaqarpunga pissusissamisungitsoq, oqareerpungami angajoqqaat annertuumik akisussaaffilimmik toqqammaviliisuusut meeqqap perorsarneqarneranut. Angajoqqaallu perorsaassapput, ilinniartitsisullu ilinniartitsissapput.

Atassummiit utikattuarparput meeqqat atuarfiani 11. Klasse eqquteqqinneqartariaqartoq, ilumoorlungalu oqassaanga atuarfitsialak iluatsissimangilaq. Meeqqat atuarfianiit ilinniarfinnut allanut ingerlariaqqittartut annertunerulertariaqarput, eqqortumillu ilinniagaqarfinnut allanut ingerlariaqqinnginnermini siunersorneqarnissaat pingaaruteqaqaluni. Tassami majoriaq tassaassanngilaq meeqqat atuarfianiit ingerlariaqqiffissaq, majoriaq tassaassaaq inunnut ikiortariaqavissortunut aammalu inuussutissarsiutigalugu ilinnialersussanut aqutissaq.

Ilinniartitaanerup aaqqissuusaanera eqaatsoq ataqatigiittorlu toqqammavilersorsinnaassavarput aatsaat, allaffissornerujussuaq minnerpaaffilerneqarpat. Maannakkut allaffissorpallaarujussuarpuq, meeqqat inuusuttut qimakkaluttuinnarpagut allaffissornerujussuaq pissutigalugu. Taamatut aaqqissuussineq isumaqarpunga nunatsinnut inuiaqatigiinnullu peqqinnangitsorujussuaq, taamaattumik naalakkersuisut kaammattorpagut tusarnaqullugu nalilersoqqullugulu ilumut allaffissorneq maannakkumut annertuumik aaliangiisuunera misissoqqullugu.

Nunatsinni pingaaruteqarpoq ilinniakkamik naammassinnittartut annertusiartornissaat aallaaviusariaqartoq, ilinniagaqassuseq qaffasissumillu ilinniagaqassuseq aallaavigalugu ineriartornissaa. Kisiat aamma Atassummiit eqqumaffigeqqarput inuussutissarsiutit pillugit ilinniagaqalerneq pitsaassutsiminiit pitsaanerulersinneqartariaqartoq eqaallisarneqarnissaa

angutserlugu inissisimatinneqartariaqartoq. Ilinniartitaaneq aallaavigineqarpat meeqqat atuarfiat aallartiffittut toqqammaviliisuusariaqarpoq, pitsaanagerusumik aallartiffiusariaqartoq isumaqarpugut. Taamaattumik isumaqarpugut kaammattortariaqarlugit Naalakkersuisut meeqqat atuarfiat toqqammaviliisuusariaqarnera pingaaruteqarluinnartuusoq, meeqqattami nunatta siunissarimmassuk taakkua tumit eqqortut atorlugit siunersorneqartariaqartut. Ilinniartitsissutit pitsaasut aallaaviusariaqarput, taamatumillu isumaqarpunga aamma meeqqat atuarfiat soqutiginaruusariaqarpoq naammassinissaanut.

Erseqqissareerpara oqariartuutigalugu tamanna, pingartuuvoq aamma eqqaamasariaqartoq tassaasoq meeqqat atuarfianut ikaarsaalinnginnermi meeraaqqeriviit tassaasariaqartut meeqqat atuarfianut ikaarsaalinnginnermi tulluarsaasussat. Tamakkua arlalitsigut eqqartorneqarsinnaasut tassaapput eqqortut. Allaffissorneq annikillisarneratigut atuartitsinerit pitsanngorsaavigineqarsinnaapput, taamaaliornikkut qulakkeerumallugu meeqqap pitsaasumik ineriartornissaa atuarfillu qimannissaanut ilinniarfinnut ikaarsaalernermi siunersorneqarnissaanut.

Taamatut oqaaseqarluta qujavugut oqallinnermi.